

სრულიად საქართველოს კათოლიკოს-პატრიარქის ქადაგება



სახელითა მამისათა და ძისათა და წმინდისა სულისათა

ჩვენთან არს ღმერთი!

დღევანდელი დღე განსაკუთრებულია. დღევანდელ დღეს ეწოდება შენდობის კვირიაკე, შენდობის დღე. დღეს საღამოს იქნება შენდობის წესი, ასე რომ მობრძანდით და მიიღეთ შენდობა.

ხვალ იწყება დიდი მარხვა. ეს არის მარხვა სინანულისა და ღმერთმა ინებოს, რომ ამ სინანულს მოჰყვეს სიხარული.

წმინდა ეფრემ ასური ამბობს: „ჰე უფალო, მომანიჭე მე განცდა თვისთა ცოდვათა და არა განკითხვად ძმისა ჩემისა“. ეს გზა – „განცდა თვისთა ცოდვათა და არა განკითხვად ძმისა ჩემისა“ ყველაზე იოლია, რომელიც მიგვიყვანს ჩვენ სასუფეველში. ამიტომ ყველამ უნდა დაინახოს თავისი თავი.

არის შემთხვევები, როცა აღსარებაზე მიდიან მოძღვართან და მოძღვარი ეკითხება თუ რა შეცოდება ჩაუდენია და იმდენად დახშულია მათი გონება, რომ მე არავითარი

ცოდვა არა მაქვსო, _ პასუხობენ.

მოძღვარი ეუბნება, _ მე მოძღვარი ვარ და მეც მაქვს ცოდვაო. შენც, შეიძლება, გქონდესო.

_ მე არა მაქვსო.

ეს იმას ნიშნავს, რომ გონება დახშული აქვს, სული დათრგუნულია. ღმერთმა ინებოს, რომ გაიხსნას ჩვენი გონება, ჩვენი სული, დავინახოთ ჩვენი შეცოდებანი და სინანულით განწმენდილნი სიხარულით შევხვდეთ ბრწყინვალე აღდგომას.

დღეს ჩვენ ვლოცავთ იარაღიშვილების გვარს. ღმერთმა დაგლოცოთ იარაღიშვილები, ღმერთმა გაგამრავლოთ, ღმერთმა სულიერი ძალა მოგანიჭოთ სახელითა მამისათა და ძისათა და წმინდისა სულისათა.

ასევე ვლოცავთ მანდატურებს, რომელნიც წესრიგს იცავენ სკოლებში ჩვენს შვილებთან. ღმერთმა დაგლოცოთ, გაგახაროთ და ღმერთმა შეინიროს თქვენი შრომა.

დღევანდელი დღე კიდევ არის ცნობილი იმით, რომ იხსენებს ეკლესია ადამისა და ევას განდევნას სამოთხიდან. ღმერთი მოწყალეა და ღმერთი შეიწყალებს კაცობრიობას.

ჩვენთან არს ღმერთი!

დალოცვილი იყავით თქვენ და სრულიად საქართველო.

<http://patriarchate.ge/geo/%E1%83%A1%E1%83%A0%E1%83%A3%E1%83%9A%E1%83%90%E1%83%A5%E1%83%90%E1%83%A0%E1%83%97%E1%83%99%E1%83%90%E1%83%97-19/>